

*DEÛS PÔCES DI DJAMBE ÈT L' CU TOT D' SÛTE OU L'ISTWÈRE DO P'TIT MANIKÈT*

Quand P'tit Manikèt èsteut èfant, si man lî d'djeut tofêr : « Mougnoz vosse soupe, mi fi ! Vos n' sèroz jamaîs grand ». Mins li, i n' mougneut jamaîs tote si soupe.

Quand gn-aveut do pwin su l' tauve, si man lî d'djeut : « Mougnoz vos crosses, mi fi ! Vos n' sèroz jamaîs grand ». Mins li, i n' mougneut jamaîs sès crosses.

Et si c'èsteut dèl tchau, si man lî d'djeut : « Mougnoz vosse buftek, mi fi ! Vos n' sèroz jamaîs grand ». Mins li, i n' mougneut jamaîs tot s' buftek.

Ça faît qui P'tit Manikèt n'a jamaîs crèchu. Deûs pôces di djambes èt l' cu tot d' sûte !

Sès parints èstin.n' anoyeûs au d'la : « I n' saurè jamaîs trover d' l'ovradje s'i d'meûre tot p'tit ! Nosse pôve gamin ! »

Pont d'ovradje ? Choûte bin :

On djoû, v'la tote one copicherîye du djins qui vorenut su l' viladje. On-aleut toûrner on film, parèt ! « Blanche-Neige et les sept nains ». Mins v'la l' producteûr qu'arive. Il èsteut tot rodje télemint qu'il èsteut mwaîs. Sès-ouys moussin.n' foû di s' tièsse. Et i criyeut : « Nom di glu d' nom di glu, d' nom di glu ! Li pansu ! Li grosse bièsse ! L'inocint quatôze ». Onk di sès-acteûrs, li cia qu'aleut djouwer Simplet aveut trové l' mwaîje pome dèl macrale, èt i l'aveut mougnaî, li ! Ça faît qu'il èsteut èdwârmu po cint-z-ans !

Pitit Manikèt a ètindu ça. Il a dit à noste ome : « Mossieû l' producteûr, èst ç' qui vos v'loz bin qui dj' faîye li role à s' place ? » L'ome l'aureut rabrèssî télemint qu' l' èsteut binauje ». « Vinoz, m' fi ! C'èst l' Bon Diè qui v's-èvôye ! »

C'è-st-insi qu' nosse Pitit Manikèt a div'nu acteûr. Après Simplet, il a djouwé Li P'tit Poucet. Et on djoû, on lî a minme mètu one cote po fé li P'tit Chaperon rouge. Il a gagnî branmint dès caurs, il a p'lu mougnaî tot ç' qu'i v'leut, mins i n'a pus jamaîs mougnaî

- ni soupe,

ni crosse di pwin

ni buftek...

...ni pomme non pus ! On n' sét jamaîs...

Jean Hamblenne